

四庫全書

子部

欽定四庫全書

巢氏諸病源候總論卷四十一

隋 巢元方 撰

婦人妊娠病諸候上

凡二十論

妊娠候

經云陰搏陽別謂之有子此是氣血和調陽施陰化也
診其手少陰脈動甚者任子也少陰心脈也心主血脈
又腎名胞門子戶尺中腎脈也尺中之脈按之不絕者

妊娠脈也三部沉浮正等按之無斷絕者有娠也又左手沉實為男右手浮大為女左右俱沉實生二男左右俱浮大生二女又尺脈左偏大為男右偏大為女左右俱大產二子又左右手尺脈俱浮為產二男不爾女作男生俱沉為產二女不爾男作女生又左手尺中脈浮大者男右手尺脈沉細者女又得太陰脈為男得太陽脈為女太陰脈沉太陽脈浮欲知男女遣面南行還復呼之左迴首是男右迴首是女又看上圖時夫從後急

呼之左迴首是男右迴首是女婦人任娠其夫左邊乳房有核是男右邊乳房有核是女懷娠一月名曰始形飲食精熟酸美受御宜食大麥無食腥辛之物是謂才貞足厥陰養之足厥陰者肝之脈也肝主血一月之時血流澁如不出故足厥陰養之足厥陰穴在足大指歧間白肉際是 任娠二月名曰始膏無食腥辛之物居必靜處男子勿勞百節皆痛是謂始藏也足少陽養之足少陽者膽之脈也主於精二月之時兒精成於胞裏

故足少陽養之足少陽穴在足小指間本節後附骨上一寸陷中者是任娠三月始胎當此之時血不流形像始化未有定儀見物而變欲令見貴盛公主好人端正莊嚴不欲令見傴僂侏儒醜惡形人及猿猴之類無食薑兔無懷刀繩欲得男者操弓矢射雄雞乘肥馬於田野觀虎豹及走犬其欲得女者則著簪珂環佩弄珠璣欲令子美好端正者數視白璧美玉看孔雀食鯉魚欲令兒多智有力則噉牛心食大麥欲令子賢良盛德

則端心正坐清虛和一坐無邪席立無偏倚行無邪徑
目無邪視耳無邪聽口無邪言心無邪念無妄喜怒無
得思慮食無到齋無邪臥無橫足思欲果瓜噉味酸菹
好芬芳惡見穢臭是謂外象而變者也手心主養之手
心主者脈中精神內屬於心能混神故手心主養之手
心主穴在掌後橫文是診其任娠脈滑疾重以手按之
散者胎已三月也 任娠四月之時始受水精以成血
脈其食宜稻稬其羹宜魚鴈是謂盛榮以通耳目而行

經絡洗浴遠避寒暑是手少陽養之手少陽者三焦之脈也內屬於府四月之時兒六府順成故手少陽養之手少陽穴在手小指間本節後二寸是也診其任娠四月欲知男女左脈疾為男右脈疾為女左右俱疾為生二子當此之時慎勿瀉之必致產後之殃何謂也是手少陽三焦之脈內屬於三焦靜形體和心志節飲食深任娠五月始受火精以成其氣臥必晏起洗浣衣服深其屋室厚其衣裳朝吸天光以避寒殃其食宜稻麥其羹

宜牛羊和以茱萸調以五味是謂養氣以定五臟者也
一本云宜食魚鱉足太陰養之足太陰脾之脈主四季
五月之時兒四支皆成故足太陰養之足太陰穴在足
內踝上三寸也診其任脈重手按之不散但疾不滑
者五月也又其脈數者必向懷脈緊者必胞阻脈遲者
必腹滿喘脈浮者必水懷為腫深任脈六月始受金精
以成其筋身欲微勞無得靜處出遊於野數觀走犬及
視走馬宜食鷙鳥猛獸之肉是謂變腠脅筋以養其爪

以牢其背脅足陽明養之足陽明者胃之脈主其口目
六月之時兒口目皆成故足陽明養之足陽明穴在太
衝上二寸是也 任娠七月始受木精以成其骨勞弱
搖支無使定止動作屈伸居處必燥飲食避寒常宜食
稻杭以密腠理是謂養骨牢齒者也手太陰養之手太
陰者肺脈主皮毛七月之時兒皮毛已成故手太陰養
之手太陰穴在手大指本節後白肉際陷中是診其任
娠七月脈實大牢強者生沈細者死懷軀七月而不可

知時時血而轉筋者此為軀血時嚏而動者非軀也懷
軀七月暴下斗餘水其胎必倚而墮此非時孤漿預下
故也 任娠八月始受土精以成膚革和心靜息無使
氣極是謂密腠理而光澤顏色手陽明養之手陽明者
大腸脈大腸主九竅八月之時兒九竅皆成故手陽明
養之手陽明穴在大指本節後宛宛中是診其任娠八
月脈實大牢強弦緊者生沈細者死 任娠九月始受
石精以成皮毛六府百節莫不畢備飲醴食甘緩帶自

持而待之是謂養毛髮多才力足少陰養之足少陰者
腎之脈腎主續縷九月之時兒脈續縷皆成故足少陰
養之足少陰穴在足內踝後微近下前動脈是也 任
娠十月五臟俱備六腑齊通納天地氣於丹田故使關
節人神咸備然可預修滑胎方法也

任娠惡阻候

惡阻病者心中憤悶頭眩四支煩疼懈惰不欲執作惡
聞食氣欲嘔鹹酸果實多睡少起世云惡食又云惡字

是也乃至三四月日以上大劇者不能自勝舉也此由婦人元本虛羸血氣不足腎氣又弱兼當風飲冷太過心下有痰水挾之而有娠也經血既閉水漬於藏藏氣不宣通故心煩憤悶氣逆而嘔吐也血脈不通經絡否澀則四支沈重挾風則頭目眩故欲有胎而病惡阻所謂欲有胎者其人月水尚來而顏色皮膚如常但苦沈重憤悶不欲食飲又不知其患所在脈理順時平和即是欲有胎也如此經二月日後便覺不通則結胎也

任娠轉女為男候

陰陽和調二氣相感陽施陰化是以有娠而三陰所會則多生女但任娠二月名曰始藏精氣成於胞裏至於三月名曰始胎血脈不流象形而變未有定儀見物而化是時男女未分故未滿三月者可服藥方術轉之令生男也

任娠養胎候

任娠之人有宿挾痼疹因而有娠或有娠之時節適乘

理致生疾病並令腑臟衰損氣力虛羸令胎不長故須服藥去其疾病益其氣血以扶養胎也

任娠禁忌候

任娠男女未分之時未有定儀見物而化故須端正莊嚴清靜和一無傾視無邪聽兒在胎日月未滿陰陽未備腑臟骨節皆未成足故自初訖于將產飲食居處皆有禁忌

任娠胎間水氣子滿體腫候

胎間水氣子滿體腫者此由脾胃虛弱腑臟之間有停水而挾以任娠故也任娠之人經血壅閉以養於胎若挾有水氣則水血相搏水漬於胎兼傷腑臟脾胃主身之肌肉故氣虛弱肌肉則虛水氣流溢於肌故令體腫水漬於胞則令胎壞然任娠臨將產之月而脚微腫者其產易所以爾者胞藏水血俱多故令易產而水乘於外故微腫但須將產之月耳若初任而腫者是水氣過多兒未成具故壞胎也壞胎脈浮者必腹滿而喘懷娠

為水腫

任娠漏胞候

漏胞者謂任娠數月而經水時下此由衝脈任脈虛不能約制太陽少陰之經血故也衝任之脈為經脈之海皆起於胞內手太陽小腸脈也手少陰心脈也是二經為表裏上為乳汁下為月水有娠之人經水所以斷者壅之以養胎而蓄之為乳汁衝任氣虛則胞內泄漏不能制其經血故月水時下亦名胞阻漏血盡則人斃也

妊娠胎動候

胎動不安者多因勞役氣力或觸冒冷熱或飲食不適
或居處失宜輕者止轉動不安重者便致傷墮若其母
有疾以動胎治母則胎安若其胎有不牢固致動以病
母者治胎則母瘥若傷動甚者候其母面赤舌青者兒
死母活母唇口青口兩邊沫出者母子俱死母面青舌
赤口中沫出母死子活

妊娠僵仆胎上搶心下血候

此謂行動倒仆或從高墮下傷損胞絡致血下動胎而血傷氣逆者胎隨氣上搶心其死生之候其母舌青者兒死母活唇口無沫兒生唇青沫出者母子俱死唇口赤舌青者母死兒活若下血不住胞燥胎枯則令胎死

任娠胎死腹中候

此或因驚動倒仆或染溫疫傷寒邪毒入於胞臟致令胎死其候當胎處冷為胎已死也

任娠腹痛候

腹痛皆由風邪入於腑臟與血氣相擊搏所為任娠之人或宿挾冷疹或新觸風邪疝結而痛其腹痛不已邪正相干血氣相亂致傷損胞絡則令動胎也

任娠心痛候

夫心痛多是風邪痰飲乘心之經絡邪氣搏於正氣交結而痛也若傷心正經而痛者為真心痛心為神統領諸藏不可受邪邪若傷之朝發夕死夕發朝死若傷心夫別絡而痛者則乍間乍盛休作有時任娠之人感其

病者痛不已氣乘胞絡傷損子臟則令動胎凡胎動則胎轉移不安不安而動於血者則血下也

任娘心腹痛候

任娘心腹痛者或由腹內宿有冷疹或新觸風寒皆因藏虛而致發動邪正相擊而并於氣隨氣下上上衝於心則心痛下攻於腹則腹痛故令心腹痛也任娘而痛之者正邪二氣交擊於內若不時瘥者其痛衝擊胞絡必致動胎甚則傷墮

任娠腰痛候

腎主腰脚因勞損傷動其經虛則風冷乘之故腰痛婦人腎以繫胞任娠而腰痛甚者多墮胎也

任娠腰腹痛候

腎主腰脚其經虛風冷客之則腰痛冷氣乘虛入腹則腹痛故令腰腹相引而痛不止多動胎腰痛甚者則胎墮也

任娠小腹痛候

任娠小腹痛者由胞絡宿有冷而任娠血不通冷血相搏故痛也痛甚亦令動胎也

任娠卒下血候

此謂卒有損動或冷熱不調和致傷於胎故卒痛下血不止者墮胎也

任娠吐血候

吐血皆由腑臟傷所為憂思驚怒皆傷臟腑氣逆故吐血吐血而心悶胃滿未欲止心悶甚者死任娠病之多

墮胎也

任娠尿血候

尿血由勞傷經絡而有熱熱乘於血血得熱流溢滲入於胞故尿血也

任娠數墮胎候

陽施陰化故得有胎榮衛和調則經養周足故胎得安而能成長若血氣虛損者子臟為風冷所居則血氣不足故不能養胎所以致胎數墮候其任娠而恒腰痛者

喜墮胎也

巢氏諸病源候總論卷四十一

欽定四庫全書

巢氏諸病源候總論卷四十二

隋 巢元方 撰

婦人任娠病諸候下

凡四十二論

任娠傷寒候

冬時嚴寒人體虛而為寒所傷即成病為傷寒也輕者
嗇嗇惡寒喻喻發熱微欬鼻塞數日乃止重者頭痛體
疼增寒壯熱久不歇亦傷胎也

任娠傷寒後復候

冬時嚴寒人體虛觸冒之得病名傷寒其狀頭痛體疼壯熱瘥後體虛尚未平復或起早或飲食過度病更如初故謂之復也

任娠時氣候

四時之間忽有非節之氣如春時應暖而反寒夏時應熱而反冷秋時應涼而反熱冬時應寒而反溫非其節而有其氣一氣之至無人不傷長少雖殊病皆相似者

多挾於毒言此時普行此氣故云時氣也任娠遇之重者傷胎也

任娠溫病候

冬時嚴寒人有觸冒之寒氣伏藏肌骨未即病至春而發謂之溫也亦壯熱大體與傷寒相似又冬時應寒而反溫溫氣傷人即病亦令壯熱謂之溫病任娠遇此病熱搏於胎皆損胎也

任娠熱病候

冬時嚴寒觸冒傷之藏於肌骨夏至乃發壯熱又為暑病暑病即熱病也此寒氣蘊積發即有毒任娠遇之多致墮胎也

任娠寒熱候

任娠寒熱病者猶是時氣之病也此病起於血氣虛損風邪乘之致陰陽并隔陽勝則熱陰勝則寒陰陽相乘二氣交爭故寒熱其任娠而感此病者熱甚則傷胎也

任娠寒瘧候

夫瘧者由夏傷於暑客於皮膚至秋因勞動血氣腠理
虛而風邪乘之動前暑熱正邪相擊陰陽交爭陽盛則
熱陰盛則寒陰陽更虛更盛故發寒熱陰陽相離寒熱
俱歇若邪動氣至交爭則復發故瘧休作有時其發時
節漸晏者此由風邪客於風府循膂而下衛氣一日一
夜常大會於風府其明日日下一節故其作發日晏其
發日早者衛氣之行風府日下一節二十一日下至尾
骶二十二日入脊內上注於伏衝之脈其行九日出於

缺盆之內其氣既上故其病發更早其間日發者由風邪內薄五臟橫連募原其道遠其氣深其行遲不能日作故間日蓄積乃發任娠而發者寒熱之氣迫傷於胎多致損動也

任娠下利候

春傷於風邪氣留連遇腸胃虛弱風邪因而傷之腸虛則洩故為下利然此水穀利也

任娠滯利候

冷熱不調腸虛者冷熱之氣客於其間熱氣乘之則赤
冷氣乘之則白冷熱相交連滯故赤白如魚腦鼻涕相
雜為滯利也

任娠胃脇支滿候

任娠經血不通上為乳汁兼以養胎若宿有停飲者則
血飲相搏又因冷熱不調動於血飲血飲乘氣逆上搶
於胃脇胃脇脹滿而氣小喘謂之支滿

任娠痰候

水飲停積結聚為痰人皆有之少者不能為害若多則成病妨害飲食乃至嘔吐任娠病之若嘔吐甚者傷胎也

任娠子煩候

臟虛而熱氣乘於心則令心煩停痰積飲在於心胃其衝冷心者亦令煩也若虛熱而煩者但煩熱而已若有痰熱而煩者則嘔吐涎沫任娠之人既血飲停積或虛熱相搏故亦煩以其任娠而煩故謂之子煩也

仕娘霍亂候

陰陽清濁相干謂之氣亂氣亂於腸胃之間為霍亂也
但飲食過度冒觸風冷使陰陽不和致清濁相干腸胃
虛者受之故霍亂也先心痛則先吐先腹痛則先利心
腹俱痛吐利並發有頭痛體疼發熱而吐利者亦為霍
亂所以然者挾風而有實故也風折血氣皮膚閉密血
氣不得宣故令壯熱風邪乘其經脈氣上衝於頭則頭
痛風氣入於腸胃腸虛則洩利胃逆則嘔吐故吐利也

吐利甚則煩府藏虛故也又手足逆冷陽氣暴竭謂之
四逆也任娠而病之吐利甚者則傷損胎也

任娠中惡候

人有忽然心腹刺痛悶亂欲死謂之中惡言惡邪之氣
中傷於人也所以然者人之血氣自養而精神為主若
血氣不和則精神衰弱故厲毒鬼氣得中之任娠病之
亦致損胎也

任娠腹滿候

任娠腹滿者由腹內宿有寒冷停飲挾以任娠重因觸冷則冷飲發動燠氣相干故令腹滿也

任娠欬嗽候

肺感於微寒寒傷於肺則成欬嗽所以然者肺主氣候皮毛寒之傷人先客皮毛故肺受之又五藏六府俱受氣於肺以四時更王五藏六府亦皆有欬嗽各以其時感於寒而為欬嗽也秋則肺受之冬則腎受之春則肝受之夏則心受之其諸藏欬嗽不已各傳於府任娠而

病之者久不已傷於胎也

任娠胃痺候

胃痺者由寒氣客於藏府上衝胃心怫怫如滿噎塞習而痺痛胃中慄慄然飲食不下謂之胃痺也而脾胃漸弱乃至斃人任娠而病之非直任婦為患亦傷損於胎也

任娠咽喉身體著毒腫候

毒腫者是風邪厲毒之氣客人肌肉搏人血氣積聚所

成然邪毒傷人無有定處隨經絡虛處而留止之故或著身體或著咽喉但毒之所停血則否澀血氣與邪相搏故成腫也其毒發於身體猶為小緩若著咽喉最急便腫塞痺痛乃至水漿不通毒入攻心心煩悶任娠者尤宜急救不爾子母俱傷也

任娠中蠱毒候

蠱毒者人有以蛇蠍蜈蚣諸蠱合著一處令其自相殘食餘一箇在者名之為蠱諸山縣人多作而敬事之因

飲食裹以毒斃人又或吐血利血是食人腑臟則死又云有緩急緩者延引日月急者止在旦夕以法術知其主呼之蠱去乃瘥平人遇之尚死況任娠者故子母俱傷也

任娠飛尸入腹候

飛尸者是五尸中一尸也其遊走皮膚貫穿臟腑每發刺痛變作無常為飛尸也任娠病之者亦損胎也

任娠患子淋候

淋者腎虛膀胱熱也腎虛不能制水則小便數也膀胱熱則水行澀澀而且數淋瀝不宣任娠之人胞繫於腎腎患虛熱成淋故謂子淋也

任娠大小便不通候

人有府藏氣實而生於熱者隨停積之處成病若熱結大腸大便不通熱結小腸小便不通若大小腸俱為熱所結故煩滿大小便不通也凡大小便不通則內熱腸胃氣逆令變乾嘔也

任娠大便秘不通候

三焦五藏不調和冷熱否結津液竭燥腸胃否澀蘊積
結於腸間則大便不通令腸否滿煩熱甚者變乾嘔所
以然者胃內熱氣逆也

任娠大小便不利候

冷熱之氣不調乘於大小腸則謂之為遊氣壅否而生
熱或熱病熱入大小腸並令大小便不利也凡大小便
不利則心脇滿食不下而煩燥不安也

任娠小便利候

小便利者腎虛胞冷不能溫制於小便故小便利也

任娠小便數候

腎與膀胱合俱主水腎氣通於陰腎虛而生熱則小便澀虛則小便數虛熱相搏雖數起而不宣快也

任娠小便不利候

腎與膀胱合俱主水水行入胞為小便臟腑有熱熱入於胞故令小便不利也

任娠小便不通候

小腸有熱熱入於胞內熱結甚者故小便不通則心脇小腸俱滿氣喘急也

任娠驚胎候

驚胎者見懷任月將滿或將產其胎神識已具外有勞傷損動而胎在內驚動也

任娠中風候

四時八方之氣為風常以冬至之日候之風從其鄉來

者長養萬物若不從鄉來者為虛風賊於人人體虛者則中之五藏六府俞皆在背藏府虛風邪皆從其俞入人中之隨府藏所感而發也心中風但偃臥不得傾側汗出脣赤汗流者可治急灸心俞百壯若脣或青或白或黃或黑此是心壞為水面目亭亭時悚動者皆不可治五六日而死若肝中風但踞坐不得低頭若繞兩目連額色微有青脣青面黃可治急灸肝俞百壯若大胷黑面一黃一白者是肝已傷不可治數日而死若脾中

風踞而腹滿身通黃吐鹹汁出者可治急灸脾俞百壯
若手足青者不可治若腎中風踞而腰痛視脇左右未
有黃如餅餠大者可治急灸腎俞百壯若齒黃赤鬢髮
直面土色者不可治也若肺中風偃臥而胃滿短氣胃
悶汗出視目下鼻上下兩邊下行至口色白可治急灸
肺俞百壯若色黃為肺已傷化為血不可治其人當妄
撮空或自拈衣如此數日而死仕娘而中風非止仕娘
為病甚者損胎也

任娠瘕候

體虛受風而傷太陽之經停滯經絡後復遇寒濕相搏發則口噤背強名之為瘕任娠而發者悶冒不識人須臾醒醒復發亦是風傷太陽之經作瘕也亦名子癰亦名子冒也

任娠鬼胎候

夫人腑臟調和則血氣充實風邪鬼魅不能干之若榮衛虛損則精神衰弱妖魅鬼精得入於藏壯如懷娠故

曰鬼胎也

任娠兩胎一生一死候

陽施陰化精盛有餘者則成兩胎胎之在胞以血氣資
養若寒溫節適虛實調和氣血強盛則胎無傷夫若冷
熱失宜氣血損弱則胎翳燥不育其兩胎而一死者是
血過於寒挾經養不調故偏夭死也候其胎上冷是胎
已死也

任娠胎痿燥候

胎之在胞血氣資養若血氣虛損胞藏冷者胎則翳燥
委伏不長其壯兒在胎都不轉動日月雖滿亦不能生
是其候也而胎在內痿燥其胎多死

妊娠過年久不產候

過年不產由挾寒冷宿血在胞而有胎則冷血相搏令
胎不長產不以時若其胎在胞日月雖多其胎翳小轉
動勞羸是挾於病必過時乃產

妊娠墮胎後血出不止候

墮胎損經脈損經脈故血不止也瀉血多者便致煩悶
乃至死也

任娠墮胎後血不出候

此由宿有風冷因墮胎血冷相搏氣虛逆上者則血結
不出也其血逆上搶心則亦煩悶甚者致死

任娠墮胎衣不出候

此由墮胎初下婦人力羸不能更用氣產胞便遇冷冷
則血澀故胞衣不出也若胞上掩心煩悶乃至於死也

任娠墮胎後腹痛虛乏候

此由墮胎之時血下遇少後餘血不盡將攝未復而勞傷氣力觸冒風冷風冷搏於血氣故令腹痛勞損血氣不復則虛乏而餘血不盡結搏於內多變成血瘕亦令月水不通也

任娠墮胎後著風候

墮胎後榮衛損傷腠理虛疎未得平復若起早當風取涼即著於風初止羸弱或飲食減少氣力不即平復若

風挾冷入腹內搏於血結成刺痛若入腸胃亦下利入
經絡或痺或疼痛若入太陽之經則腰背強直成瘕或
角弓反張或口喎僻或緩弱不隨或一邊攣急各隨所
傷處而成病也

任娠欲去胎候

間有任娠之人羸瘦或挾疾病既不能養胎兼害母故
欲去之

巢氏諸病源候總論卷四十二

欽定四庫全書

子部

巢氏諸病源候總論卷四十三至六

詳校官太醫院恩糧_臣孔毓秀

編修_臣倉聖脈覆勘

總校官庶吉士_臣何思鈞

校對官中書_臣吳俊

謄錄舉人_臣楊兆豐

欽定四庫全書

巢氏諸病源候總論卷四十三

隋 巢元方 撰

婦人將產病諸候

凡三論

產法

人處三才之間稟五行之氣陽施陰化故令有子然五行雖復相生而剛柔刑殺互相害剋至於將產則有日遊反丈夫禁忌若犯觸之或橫致諸病故產時坐臥產處

須順四時五行之氣故謂之產法也

產防暈法

防暈者諸臨產若觸犯日遊反支諸所禁忌則令血氣不調理而致暈也其暈之狀心煩悶氣欲絕是也故須預以法術防之

胞衣不出候

有產兒下苦胞衣不落者世謂之息胞由產婦初時用力比產兒出而體已疲頓不能更用氣產胞經停之間

外冷乘之則血道否澀故胞久不出須急以方藥救治
不爾害於兒所以爾者胞系連兒臍胞不出則不得以
時斷臍浴洗冷氣傷兒則成病也舊方胞衣久不出恐
損兒者依法截臍而以物繫其帶一頭亦有產而看產
人不用意慎護而挽牽甚胞系斷者其胞上掩心則斃
人也縱令不死久則成病也

婦人難產病諸候

凡七論

產難候

產難者或先因漏胎去血臟燥或子臟宿挾疹病或觸禁忌或始覺腹痛產時未到便即驚動穢露早下致子道乾澀產婦力疲皆令難也候其產婦舌青者兒死母活脣青口青口兩邊沫出者子母俱死面青舌赤沫出者母死子活故將產坐臥產處須順四時方面并避五行禁忌若有犯觸多令產難產難腹痛而腰不痛者未產也若腹痛連腰甚者即產所以然者腎候於腰胞繫於腎故也診其尺脈轉急如切繩轉珠者即產也

橫產候

橫產由初覺腹痛產時未至驚動傷早兒轉未竟便用力產之故令橫也或觸犯禁忌所為將產坐臥產處須順四時方面并避五行禁忌若觸犯多致災禍也

逆產候

逆產者初覺腹痛產時未至驚動傷早兒轉未竟便用力產之則令逆也或觸犯禁忌故產處及坐臥須順四時方面并避五行禁忌若觸犯多致災禍

養生方云任娠大小便勿至非常之去處必逆產殺人
也

產子上逼心候

任娠將養得所則氣血調和故兒在胎則安當產亦易
若節適失宜則血氣乖理兒在胎則並動至產育亦難
產而子上迫於心者由產難用力胎動氣逆胎上衝迫
於心也凡胎上迫心則暴悶絕胎下乃甦甚者至死凡
產處及坐臥須順四時方面并避五行禁忌若有觸犯

多致災禍也

產子但趨後孔候

產子但趨後孔者由坐臥未安忽遽強嘔氣暴衝擊故
兒失其道婦人產有坐有臥若坐產者須正坐傍人扶
抱肋腰持捉之勿使傾斜故兒得順其理臥產者亦待
臥定背平著席體不偃曲則兒不失其道若坐臥未安
身體斜曲兒心轉動忽遽強嘔氣暴衝擊則令兒趨
後孔或橫或逆皆由產時忽遽或觸犯禁忌坐臥不

安審所為故產坐臥須平正順四時方面避五行禁忌
若有觸犯多致災禍也

產已死而子不出候

產婦已死而子不出或觸犯禁忌或產時未到驚動傷
早或傍看產人抱腰持捉失理皆令產難而致胎上掩
心悶絕故死也候其婦將困之際面青舌赤口沫出者
則母死兒活也故產處坐臥須順四時方面避五行禁
忌若有觸犯多招災禍也

產難子死腹中候

產難子死腹中者多因驚動過早或觸犯禁忌致令產難產難則穢沃下產時未到穢露已盡而胎枯燥故子死腹中候其產婦舌青黑及胎上冷者子已死也故產處坐臥須順四時方面避五行禁忌若有觸犯多招災禍也

婦人產後病諸候上 凡三十論

產後血暈悶候

運悶之狀心煩氣欲絕是也亦有去血過多亦有下血極少皆令暈若產去血過多血虛氣極如此而暈悶者但煩悶而已若下血過少而氣逆者則血隨氣上掩於心亦令暈悶則煩悶而心滿急二者為異亦當候其產婦血下多少則知其產後應暈與不暈也然煩悶不止則斃人凡產時當向坐臥若觸犯禁忌多令暈悶故血下或多少是以產處及坐臥須順四時方面避五行禁忌若有觸犯多招灾禍也

產後血露不盡候

凡任娠當風取涼則胞絡有冷至於產時其血下必少或新產而取風涼皆令風冷搏於血致使血不宣消蓄積在內則有時血露淋瀝下不盡

產後惡露不盡腹痛候

任娠取風涼過度胞絡有冷比產血下則少或新產血露未盡而取風涼皆令風冷搏於血血則壅滯不宣消蓄積在內有冷氣共相搏擊故令痛也甚者則變成

血瘀亦令月水不通也

產後血上搶心痛候

產後氣虛挾宿寒寒搏於血血則凝結不消氣逆上者則血隨上搶衝擊而心痛也凡產餘血不盡血冷則結與氣相搏則痛因重過於寒血結彌甚變成血瘀亦令月水否澀不通

半產候

半產謂妊娠骨節腑臟漸具而日月未足便產也多

因勞役驚動所致或觸犯禁忌亦然也

產後血瘀痛候

新產後有血氣相擊而痛者謂之瘀痛瘀之言假也謂其痛浮假無定處也此由宿有風冷血氣不治至產血下少故致此病也不急治多成積結妨害月水輕則否澀重則不通

產後風虛腫候

夫產傷血勞氣腠理則虛為風邪所乘邪搏於氣不得

宣泄故令虛腫輕浮如吹者是邪搏於氣氣腫也若皮薄如熟李狀則變為水腫也氣腫發汗即愈水腫利小便即瘥

產後腹中痛候

產後臟虛或宿挾風寒或新觸冷與氣相擊搏故腹痛若氣逆上者亦令心痛胃脇痛也久則變成疝瘕

產後心腹痛候

產後氣血俱虛遇風寒乘之與血氣相擊隨氣而上衝

於心或下攻於腹故令心腹痛若久痛不止則變成疝瘕

產後心痛候

產後臟虛遇風冷客之與血氣相搏而氣逆者上攻於心之絡則心痛凡心痛乍間乍甚心之夫別絡為邪所傷也若邪傷心之正經為真心痛朝發夕死夕發朝死所以然者心為諸臟之主不受邪邪傷即死也

產後小腹痛候

此由產時惡露下少胞絡之間有餘血者與氣相擊搏令小腹痛也因重遇冷則血結變成血瘕亦月水不利也

產後腰痛候

腎主腰脚而婦人以腎繫胞產則勞傷腎氣損動胞絡虛未平復而風冷客之冷氣乘腰者則令腰痛也若寒冷邪氣連滯腰脊則痛久不已後有妊娠墮胎所以然者胞繫腎腎主腰脊也

產後兩脅腹滿痛候

膀胱宿有停水因產惡露下少血不宣消水血壅否與氣相搏積在膀胱故令脅腹俱滿而氣動與水血相擊則痛也故令兩脅腹滿痛亦令月水不利亦令成血瘕也

產後虛煩短氣候

此由產時勞傷重者血氣虛極則其後未得平和而氣逆乘心故心煩也氣虛不足故短氣也

產後上氣候

肺主氣五臟六腑俱稟氣於肺產則氣血俱傷臟腑皆損其後肺氣未復虛竭逆上故上氣也

產後心虛候

肺主氣心主血脈而血氣通榮腑臟徧循經絡產則血氣傷損臟腑不足而心統領諸臟其勞傷不足則令驚悸恍惚是心氣虛也

產後虛煩候

產血氣俱傷臟腑虛竭氣在內不宣故令煩也

產後虛熱候

產後腑臟勞傷血虛不復而風邪乘之搏於血氣使氣不宣泄而否澀生熱或夫節煩憤或脣乾燥但因虛生熱故謂之虛熱也

產後虛羸候

夫產損動腑臟勞傷氣血輕者節養將攝滿月便得平復重者其日月雖滿氣血猶未調和故虛羸也然產後

虛羸將養失所多沉滯勞瘠乍起乍臥風冷多則辟瘦
顏色枯黑食飲不消風熱多則腰退虛乏顏色無異於
常食亦無味甚傷損者皆著床此勞瘠也

產後風冷虛勞候

產則血氣勞傷腑臟虛弱而風冷客之風冷搏血氣血
氣則不能自溫於肌膚使人虛乏疲頓致羸損不平復
謂之風冷虛勞若久不瘥風冷乘虛而入腹搏於血則
否澁入腸則下利不能養或食不消人子臟并胞臟冷

亦使無子也

產後汗出不止候

夫汗由陰氣虛而陽氣加之裏虛表實陽氣獨發於外故汗出也血為陰產則傷血是為陰氣虛也氣為陽其氣實者陽加於陰故令汗汗出而陰氣虛弱不復者則汗出不止凡產後皆血虛故多汗因之遇風則變為瘧縱不成瘧則虛乏短氣身體柴瘦脣口乾燥久變經水斷絕津液竭故也

產後汗血候

肝藏血心主血脈產則勞損肝心傷動血氣血為陰陰虛而陽氣乘之即令汗血此為陰氣大虛血氣傷動故因汗血出乃至斃人

產後虛渴候

夫產水血俱下腑臟血燥津液不足宿挾虛熱者燥竭則甚故令渴

產後餘疾候

產後餘疾由產勞傷腑臟血氣不足日月未滿而起早
勞役虛損不復為風邪所乘令氣力疲乏肌肉柴瘦若
氣冷入於腸胃腸胃虛冷時變下利若入搏於血則經
水否澀冷搏氣血亦令腹痛隨腑臟虛處乘虛傷之變
成諸疾以其因產傷損餘勢不復致羸瘠疲頓乍瘥乍
甚故謂產後餘疾也

產後中風候

產則傷動血氣勞損腑臟其後未平復起早勞動氣虛

而風邪乘虛傷之致發病者故曰中風若風邪冷氣初客皮膚經絡疼痺不仁若乏少氣其人筋脈挾寒則攣急過僻挾渴則強脈緩弱若入傷諸臟腑恍惚驚悸隨其所傷腑臟經絡而為諸疾凡中風風先客皮膚後因虛入傷五臟多從諸臟俞入若心中風但得偃臥不得傾側汗出若唇赤汗流者可治急灸心俞百壯唇或青或白或黃或黑此是心壞為水面目亭亭時悚聽皆不可復治五六日而死若肝中風視坐不得頭眩若繞兩

目連額上灸微指青唇青面黃可治急灸肝俞百壯若
大青黑面一黃一白者是肝已傷不可復治數日而死
若脾中風踞而腹滿體通黃吐鹹水出可治急灸脾俞
百壯若手足青者不可復治也腎中風踞而腰痛視脅
左右未有黃色如餅餠大者可治急灸腎俞百壯若齒
黃赤鬢髮直面土色不可復治也肺中風偃臥而脅滿
短氣冒悶汗出視目下鼻上下兩邊下行至口色白可
治急灸肺俞百壯若色黃為肺已傷化為血而不可復

治其人當妄掇空或自拈衣如此數者死

產後中風口噤候

產後中風口噤者是其氣虛而風入於額頰夾口之筋也手三陽之節結入於頷產則勞損腑臟傷動筋脈風乘之者其三陽之筋偏虛則風偏搏之筋得風冷則急故令口噤也

產後中風瘕候

產後中風瘕者因產傷動血脈臟腑虛竭飲食未復未

滿日月榮衛虛傷風氣得入五臟傷太陽之經復感寒濕寒搏於筋則發痙其狀口急噤背強直搖頭馬鳴腰為反折須臾十發氣急如絕汗出如雨手拭不及者皆死

產後中柔風候

柔風者四肢不收或緩或急不得俛仰也由陰陽俱虛風邪乘之風入於陽則表緩四肢不收也入於陰則裏急不得俛仰也產則血氣皆損故陰陽俱虛未得平復

而風邪乘之故也

產後中風不隨候

產後腑臟傷動經絡虛損日月未滿未得平復而起早
勞動風邪乘虛入邪搏於陽經者氣行則遲機關緩縱
故令不隨也

產後風虛癲狂候

產後血氣俱虛受風邪入并於陰則癲忽發臥地吐涎
口喎目急手足繚左又無所覺知良久乃甦是也邪入

并於陽則狂發則言語倒錯或自高賢或罵詈不避尊卑是也產則傷損血氣陰陽俱虛未平復者為風邪所乘邪乘血氣乍并於陽乍并於陰故癲狂也

巢氏諸病源候總論卷四十三

欽定四庫全書

巢氏諸病源候總論卷四十四

隋 巢元方 撰

婦人產後病諸候下

凡四十一論

產後月水不利候

手太陽少陰之經主下為月水太陽小腸之經少陰心之經也心主血脈因產傷動血氣其後虛損未復而為風冷客於經絡冷搏於血則血凝澁故令月水不利也

產後月水不調候

夫產傷動血氣虛損未復而風邪冷熱之氣客於經絡乍冷乍熱冷則血結熱則血消故令血或多或少乍在月前乍在月後故為不調也

產後月水不通候

夫產傷動血氣其後虛損未平復為風冷所傷血之為性得冷則凝結故風冷傷經血結於胞絡之間故令月水不通也凡血結月水不通則變成血瘕水血相并後

遇脾胃衰弱肌肉虛者變水腫也

產後帶下候

帶下之病由任脈虛損任脈為經絡之海產後血氣勞損未平復為風冷所乘傷於任脈冷熱相交冷多則白多熱多則赤多也相兼為帶下也

又云帶下有三門一曰胞門二龍門三曰玉門產後屬胞門謂因產傷損胞絡故也

產後崩中惡露不盡候

產傷於經血其後虛損未平復或勞役損動而血暴崩下遂因淋瀝不斷時來故謂崩中惡露不盡凡崩中若小腹急滿為內有瘀血不可斷之斷之終不斷而加小腹脹滿為難愈若無瘀血則可斷易治也

產後利候

產後虛損未平復而起早傷於風冷風冷乘虛入於大腸腸虛則泄故令利也產後利若變為血利則難治世謂之產子利也

產後利腫候

因產勞傷榮衛脾胃虛弱風冷乘之水穀不結大腸虛則洩成利也利而腫者脾主土候肌肉土性本剋水今脾氣衰微不能剋消於水水氣流溢散在皮膚故令腫也

產後虛冷洞利候

產勞傷而血氣虛極風冷乘之入於腸胃腸胃虛而暴得冷腸虛則泄遇冷極虛故變洞利也

產後滯利候

產後虛損冷熱之氣客於腸胃熱乘血血滲於腸則赤冷搏腸間津液則變白其冷熱相交故赤白相雜連滯不止故謂滯利也

產後冷熱利候

產後臟虛而冷熱之氣入於腸胃腸虛則泄故成冷熱利凡利色青與白為冷黃與赤為熱不止熱甚則變生血冷極則生白膿膿血相雜冷熱不調則變滯利也

產後客熱利候

產後臟虛而熱氣乘之熱入於腸腸虛則洩故為客熱利色黃是也熱甚則黃赤而有血也

產後赤利候

赤利血利也因產後血虛為熱氣所乘熱搏血滲入腸腸虛而洩為血利凡血利皆是多熱熱血不止蘊瘀成膿血利也

產後陰下脫候

產而陰脫者由宿有虛冷因產用力過度其氣下衝則

陰下脫也

產後陰道痛腫候

臟氣宿虛因產風邪乘於陰邪與血氣相搏在其腠理故令痛血氣為邪所壅否故腫也

產後陰道開候

子臟宿虛因產冷氣乘之血氣得冷不能相榮故令開也

產後遺尿候

因產用氣傷於膀胱而冷氣入胞囊胞囊洩漏不禁小便故遺尿多因產難所致

產後淋候

因產虛損而熱氣客胞內虛則起數熱則洩漏故成淋也

產後渴利候

渴利者渴而引飲隨飲隨小便而謂之渴利也膀胱與腎為表裏膀胱為津液之府婦人以腎繫胞產則血水

俱下傷損腎與膀胱之氣津液竭燥故令渴也而腎氣下通於陰腎虛則不能制水故小便數是為渴利也

產後小便數候

胞內宿有冷因產氣虛而冷發動冷氣入胞虛弱不能制其小便故令數

產後尿血候

夫產傷損血氣血氣則虛而挾於熱搏於血血得熱流散滲於胞故血隨尿出是為尿血

產後大小便血候

夫產傷動血氣腑臟勞損血傷未復而挾於熱血得熱則妄行大腸及胞囊虛者則血滲入之故因大小便而血出也

產後大小便不通候

大小腸宿有熱因產則血水俱下津液暴竭本挾於熱大小腸未調和故令大小便澀結不通也

產後大便不通候

腸胃本挾於熱因產又水血俱下津液竭燥腸胃否澀
熱結腸胃故大便不通也

產後小便不通候

因產動氣氣衝於胞胞轉屈辟不得小便故也亦有小
腸本挾於熱因產水血俱下津液竭燥胞內熱結則小
便不通也然胞轉則小腹脹滿氣急絞痛若虛熱津液
竭燥者則不甚脹急但不通津液生氣和則小便也

產後小便難候

產則津液空竭血氣皆虛有熱客於胞者熱停積故小便
便否澀而難出

產後嘔候

胃為水穀之海水穀之精以為血氣血氣榮潤腑臟因
產則腑臟傷動有血虛而氣獨盛者氣乘腸胃腸胃燥
澀其氣則逆故嘔不下食也

產後欬嗽候

肺感微寒則成欬嗽而肺主氣因產氣虛風冷傷於肺

故令欬嗽也

產後時氣熱病候

四時之間忽有非節之氣而為病者謂之時氣產後體虛而非節之熱氣傷之故為產後時氣熱病也診其脈弦小者足溫則生足寒則死凡熱病脈應浮滑而懸急以為不順手足應溫而反冷為四逆必死也

產後傷寒候

觸冒寒氣而為病謂之傷寒產婦血氣俱虛日月未滿

而起早勞動為寒所傷則嗇嗇惡寒吸吸微熱數日
乃歇重者頭及骨節皆痛七八日乃瘥也

產後寒熱候

因產勞傷血氣使陰陽不和互相乘剋陽盛則熱陰盛
則寒陰陽相加故發寒熱凡產餘血在內亦令寒熱其
腹時刺痛者是也

產後瘧候

夫瘧者由夏傷於暑客在皮膚至秋因勞動血氣腠理

虛而風邪乘之動前暑熱止氣相擊陰陽交爭陽盛則
熱陰盛則寒陰陽更盛故發寒熱陰陽相離則寒熱俱
歇若邪動氣至交爭復發故瘧休作有時其發時節漸
晏者此由邪客於風府邪循膂而下衛氣一日一夜常
大會於風府其明日下一節故其作日晏其發早者衛
氣之行風府日下一節二十一日至尾骶二十二日入
脊內上注於伏衝之脈其行九日出於缺盆之內其氣
既上故其病發更早其間日發者由邪氣內薄五臟橫

連募原其道遠其氣深其行遲不能日作故間日蓄積乃發產後血氣損傷而宿經傷暑熱今因產虛復遇風邪相折陰陽交爭邪正相干故發作成瘧也

產後積聚候

積者陰氣五臟所生聚者陽氣六腑所成皆由飲食失節冷熱不調致五臟之氣積六腑之氣聚積者痛不離其部聚者其痛無有常處所以然者積為陰氣陰性沈伏故痛不離其部聚為陽氣陽性浮動故痛無常處

產婦血氣傷損腑臟虛弱為風冷所乘搏於臟腑與氣血相結故成積聚也

產後癥候

癥病之候腹內塊按之牢強推之不移動是也產後而有癥者由臟虛餘血不盡為風冷所乘血則凝結而成癥也

產後癖候

癖病之狀脅下弦急刺痛是也皆由飲食冷熱不調停

積不消所成產後臟虛為風冷搏於停飲結聚故成癖也

產後內極七病候

產後血氣傷竭為內極七病則舊方所云七害也一者害食二者害氣三者害冷四者害勞五者害房六者害任七者害睡皆產時傷動血氣其後虛極未平復犯此七條而生諸病凡產後氣血內極其人羸疲萎黃冷則心腹絞痛熱則肢體煩疼經血否澀變為積聚癥瘕也

產後目瞑候

目不痛不腫但視物不明謂之目瞑肝藏血候主於目
產則血虛肝氣不足故目瞑也

產後耳聾候

腎氣通耳而婦人以腎繫胞因產血氣傷損則血氣虛
其經為風邪所乘故令耳聾也

產後虛熱口生瘡候

產後口生瘡者心藏虛熱心關竅於口而主血脈產則

血氣虛臟有客熱氣上衝胃膈重發於口故生瘡也

產後身生瘡候

產則血氣傷損腠理虛為風所乘風邪與血氣相搏臟腑上熱熏發肌膚故生瘡也

產後乳無汁候

婦人手太陽少陰之脈下為月水上為乳汁任娠之人月水不通初以養胎既產則水血俱下津液暴竭經血不足者故無乳汁也

產後乳汁溢候

婦人手太陽少陰之脈上為乳汁其產雖血水俱下其經血盛者則津液有餘故乳汁多而溢出也

巢氏諸病源候總論卷四十四

欽定四庫全書

巢氏諸病源候總論卷四十五

隋 巢元方 撰

小兒雜病諸候一

凡二十九論

養小兒候

經說年六歲已上為小兒十八已上為少年二十已上為壯年五十已上為老年也其六歲已還者經所不載是以乳下嬰兒病難治者皆無所承按故也中古有巫

方立小兒顱顱經以占夭壽判疾病死生世所相傳有
小兒方焉逮乎晉宋推諸蘇家傳龍衣有驗流於人間
小兒始生肌膚未成不可暖衣暖衣則令筋骨緩弱宜
時見風日若都不見風日則令肌膚脆軟便易傷損皆
當以故絮著衣莫用新綿也天和暖無風之時令母將
抱日中嬉戲數見風日則血凝氣剛肌肉硬密堪耐風
寒不致疾病若常藏在幃帳之內重衣溫暖譬如陰地
之草木不見風日軟脆不任風寒又當薄衣薄衣之法

當從秋習之不可以春夏卒減其衣則令中風寒從秋習之以漸稍寒如此則必耐寒冬月但當著兩薄襦一複裳耳非不忍見其寒適當佳耳愛而暖之適所以害也又當消息無令汗出汗出則致虛損便受風寒晝夜寤寐皆當慎之其飲乳食哺不能無痰癖常當節適乳哺若微不進仍當將護之凡不能進乳哺則宜下之如此則終不致寒熱也又小兒始生生氣尚盛無有虛勞微惡則須下之所損不足言及其愈病則致深益若不

時下則成大疾疾成則難治矣其冬月下之難將護然有疾者不可不下夏月下之後腹中常當小脹滿故當節哺乳將護之數日間又節哺之當令多少有常劑兒稍大食哺亦當稍增若減少者此是腹中已有小不調也便當微將藥勿復哺之但當乳之甚者十許日輕者五六日自當如常若都不肯食哺而但飲乳者此是有癖為疾重要當下之不可不下不下則致寒熱或吐而發癰或致下利此皆病重不早下之所為也則難治先

治其輕時兒不耗損而病速除矣小兒所以少病癰者其母懷娠時時勞役運動骨血則氣強胎養盛故也若侍御多血氣微胎養弱則兒軟脆易傷故多病癰兒皆須著帽項衣取燥菊花為枕枕之兒母乳兒三時摸兒項風池若壯熱者即須熨使微汗微汗不瘥便灸兩風池及背第三椎第五椎第七椎第九椎兩邊各二壯與風池凡為十壯一歲兒七壯兒大者以意節度增壯數可至三十壯惟風池特令多七歲已上可百壯小兒常

須慎護風池諺云戒養小兒慎護風池風池在頸項筋
兩轅之邊有病乃治之疾微慎不欲妄針灸亦不用輒
吐下所以然者針灸傷經絡吐下動腑臟故也但當以
除熱湯浴之除熱散粉之除熱赤膏摩之又以臍中膏
塗之令兒在涼處勿禁水洗常以新水洗新生無疾慎
不可逆針灸逆針灸則忍痛動則脈喜因成癰河洛間
土地多寒兒喜病瘕其俗生兒三日喜逆灸以防之又
灸頰以防噤有噤者舌下脈急牙車筋急其土地寒皆

決舌下去血灸頰以防噤江東地溫無此疾古方既傳
有逆針灸之法今人不詳南北之殊便按方用之多害
於小兒是以田舍小兒任自然皆得無橫夭又云春夏
決定不得下小兒所以爾者小兒腑臟之氣軟弱易虛
易實下則下焦必益虛上焦生熱熱則增痰痰則成病
自非當病不可下也

變蒸候

小兒變蒸者以長血氣也變者上氣蒸者體熱變蒸有

輕重其輕者體熱而微驚耳冷髓亦冷上脣頭白泡起如死魚目珠子微汗出而近者五日而歇遠者八九日乃歇其重者體壯熱而脈亂或汗或不汗不欲食食輒吐呢無所苦也變蒸之時目白睛微赤黑睛微白亦無所苦蒸畢自明了矣先變五日後蒸五日為十日之中熱乃除變蒸之時不欲驚動勿令傍邊多人變蒸或早或晚依時如法者少也初變之時或熱甚者遠日數不歇審計日數必是變蒸服黑散發汗熱不止者服紫雙

凡小瘡便止勿復服之其變蒸之時遇寒加之則寒熱
交爭腹痛夭矯啼不止者熨之則愈變蒸與溫壯傷寒
相似若非變蒸身熱耳熱髓亦熱此乃為他病可為餘
治審是變蒸不得為餘治其變日數從初生至三十二
日一變六十四日再變變且蒸九十六日三變變者丹
孔出而泄也至一百二十八日四變變且蒸一百六十
日五變一百九十二日六變變且蒸二百二十四日七
變二百五十六日八變變且蒸二百八十八日九變三

百二十日十變變且蒸積三百三十日小蒸畢後六十
四日大蒸後百二十八日復蒸積五百七十六日大小
蒸畢也

溫壯候

小兒溫壯者由腑臟不調內有伏熱或挾宿寒皆搏於
胃氣足陽明為胃之經主身之肌肉其胃不和調則氣
行壅澀故蘊積體熱名為溫壯候小兒大便秘其糞黃而
臭此腹內有伏熱宜將服龍鬚湯若糞白而酢臭則挾

宿寒不消當服紫葢丸輕者少服藥令默除之甚者小
增藥令微利皆當節乳哺數日令胃氣和調若不節乳
哺則病易復復則傷其胃氣令腹滿再三利尚可過此
則傷小兒矣

壯熱候

小兒壯熱者是小兒血氣盛五臟生熱熏發於外故令
身體壯熱大體與溫壯相似而有小異或挾伏熱或挾
宿寒其挾伏熱者大便黃而臭挾宿寒者糞白而有酸

氣此二者府藏不調冷熱之氣俱乘腸胃蘊積染漸而發溫溫然熱不甚盛是溫壯也其壯熱者是血氣盛熏發於外其發無漸壯熱甚以此為異若壯熱不歇則變為驚極重者亦變癇也

驚候

小兒驚者由血氣不和熱實在內心神不定所以發驚甚者掣縮變成癇又小兒變蒸亦微驚所以然者亦由熱氣所為但須微發驚以長血脈不欲大驚大驚乃灸

驚脈若五六十日灸者驚復更甚生百日後灸驚脈乃善耳

欲發癇候

夫小兒未發癇欲發之候或溫壯連滯或搖頭弄舌或睡裏驚掣數齧齒如此是欲發癇之證也

癇候

癇者小兒病也十歲已上為癲十歲已下為癇其發之狀或口眼相引而目睛上搖或手足掣縱或背脊強直

或頸項反折諸方說癇名證不同大體其發之原皆因三種三種者風癇驚癇食癇是也風癇者因衣厚汗出而風入為之驚癇者因驚怖大啼乃發食癇者因乳哺不節所成然小兒氣血微弱易為傷動因此三種變作諸癇凡諸癇正發手足掣縮慎勿捉持之捉則令曲突不隨也

發癇瘥後身體頭面悉腫滿候

凡癇發之狀或口眼相引或目睛上搖或手足掣縱或

背脊強直或頭項反折或屈指如數皆由以兒當風取涼乳哺失節之所為也其癰瘡後而腫滿者是風癰風癰因小兒厚衣汗出因風取涼而得之初發之狀屈指如數然後掣縮是也其癰雖瘡氣血尚虛而熱未盡在皮膚與氣相搏致令氣不宣泄故停并成腫也

發癰瘡後六七歲不能語候

凡癰發之狀口眼相引或目睛上搖或手足痠癢或脊背強直或頭項反折屈指如數皆由以兒當風取涼乳哺

失節之所為也而癇發瘥後不能語者是風癇風癇因
兒衣厚汗出以兒乘風取涼太過為風所傷得之其初
發之狀屈指如數然後發瘳瘳是也心之聲為言開竅
於口其癇發雖止風冷之氣猶滯心之絡脈使心氣不
和其聲不發故不能言也

驚癇候

驚癇者起於驚怖大啼精神傷動氣脈不定因驚而發
作成癇也初覺兒欲驚急持抱之驚自止故養小兒常

慎驚勿聞大聲每持抱之間常當安徐勿令怖又雷鳴時常塞兒耳并作餘細聲以亂之驚癇當按圖灸之摩膏不可大下何者驚癇心氣不定下之內虛則甚難治凡諸癇正發手足掣縮慎不可捉持之捉之則令曲突不隨也

風癇候

風癇者由乳養失理血氣不和風邪所中或衣厚汗出腠理開風因而入初得之時先屈指如數乃發掣縮是

也當與純心湯又病先身熱瘈瘲驚啼喚而後發癇脈浮者為陽癇內在六府外在肌膚猶易治病先身冷不驚瘈不啼喚乃成病發時脈沈者為陰癇內在五藏外在骨髓極者難治病發時身軟時醒者謂之癇身強直反張如尸不時醒者謂之瘈診其心脈滿大癇瘈筋攣肝脈小急亦癇瘈筋攣尺寸脈俱浮直上直下此為督脈腰背強直不得俛仰小兒風癇三部脈緊急癇可治小兒脈多似雀聞要以三部脈為主若緊者必風癇凡

諸癰發手足掣縮慎勿持之捉則令曲突不隨也

患癰瘡後更發候

癰發之狀或口眼相引目睛上搖或手足瘳癰或背脊強直或頭項反折或屈指如數皆由當風取涼乳哺失節之所為其瘡之後而更發者是餘勢未盡小兒血氣軟弱或因乳食不節或風冷不調或更驚動因而重發如此者多成常疹凡諸癰正發手足掣縮慎勿持之捉則令曲突不隨也

傷寒候

傷寒者冬時嚴寒而人觸冒之寒氣入腠理搏於血氣則發寒熱頭痛體疼謂之傷寒又春時應暖而反寒此非其時有其氣傷人即發病謂之時行傷寒者小兒不能觸冒寒氣而病傷寒者多由大人解脫之時久故令寒氣傷之是以小兒亦病之診其脈來一投而止者便是得病一日假令六投而止者便是得病六日其脈來洪者易治細微者難治也

傷寒解肌發汗候

傷寒是寒氣客於皮膚寒從外搏於血氣腠理閉密冷氣在內不得外泄蘊積故頭痛壯熱體疼所以須解其肌膚令腠理開津液為汗發泄其氣則熱歇凡傷寒無問長幼男女於春夏宜發汗又脈浮大宜發汗所以然者病在表故也

傷寒挾實壯熱候

傷寒是寒氣客於皮膚搏於血氣腠理閉密氣不宣泄

蘊積生熱故頭痛體疼而壯熱其人本藏氣實者則寒氣與實氣相搏而壯熱者謂之挾實實者有二種有冷有熱其熱實糞黃而臭其冷實食不消糞白而酸氣比候知之其內雖有冷熱之殊外皮膚皆壯熱也

傷寒兼驚候

傷寒是寒氣客於皮膚搏於血氣使腠理閉密氣不宣泄蘊積生熱故頭痛體疼而壯熱也其兼驚者是熱乘心心主血脈小兒血氣軟弱心神易動為熱所乘故發

驚驚不止則變驚癇也

傷寒大小便不通候

傷寒是寒氣客於皮膚搏於血氣使腠理閉密不宣泄
蘊積生熱故頭痛體疼而壯熱其大便不通是寒搏於
氣而生熱熱流入大小腸故澀結不通凡大小便不通
則內熱不歇或乾嘔或言語而氣還逆上則心腹脹滿
也

傷寒腹滿候

傷寒是寒氣客於皮膚搏於血氣使腠理閉密氣不宣
泄蘊積生熱故頭痛體疼而壯熱其腹滿者是熱入腹
傳於藏藏氣結聚故令腹滿若挾毒者則腹滿心煩懊
悶多死

傷寒咽喉痛候

傷寒是寒氣客於皮膚搏於血氣使腠理閉密氣不宣
泄蘊積生熱故頭痛體疼壯熱其咽喉痛者是心胃熱
盛氣上衝於咽喉故令痛若挾毒則喉痛結腫水漿不

入毒還入心煩悶者死

傷寒嗽候

傷寒是寒氣客於皮膚搏於血氣使腠理閉密氣不宣
泄蘊積生熱故頭痛體疼而壯熱其嗽者邪在肺肺候
身之皮毛而主氣傷寒邪氣先客皮膚隨氣入肺故令
嗽重者有膿血也

傷寒後嗽候

傷寒是寒氣客於皮膚搏於血氣使腠理閉密氣不宣

泄蘊積生熱故頭痛壯熱體疼也瘥後而猶嗽者是邪氣猶停在肺未盡也寒之傷人先客皮毛皮毛肺之候肺主氣寒搏肺氣入五臟六腑故表裏俱熱熱退之後肺尚未和邪猶未盡邪隨氣入肺與肺氣相搏故傷寒後猶病嗽也

傷寒汗出候

傷寒者是寒氣客於皮膚搏於血氣使腠理閉密氣不宣泄蘊積生熱故頭痛體疼壯熱也而汗出者陽虛

受邪邪搏於氣故發熱陰氣又虛邪又乘於陰陰陽俱虛不能制其津液所以傷寒而汗出也

傷寒餘熱往來候

傷寒是寒氣客於皮膚搏於血氣腠理閉密氣不宣泄蘊積生熱使頭痛體疼而壯熱也其餘熱往來者是邪氣與正氣交爭正氣勝則邪氣却散故寒熱俱歇若邪氣未盡者時干於正氣正氣為邪氣所干則壅否還熱故餘熱往來不已也

傷寒已得下後熱不除候

傷寒是寒氣客於皮膚搏於血氣使腠理閉密不得
宣泄蘊積生熱故頭痛體疼而壯熱也若四五日後熱
歸入裏則宜下之得利後熱猶不除者餘熱未盡故其
狀肉常溫溫而熱也

傷寒嘔候

傷寒是寒氣客於皮膚搏於血氣腠理閉密氣不宣
泄蘊積生熱故頭痛體疼而壯熱其嘔者是胃氣虛熱

乘虛入胃胃得熱則氣逆故嘔也

傷寒熱渴候

傷寒是寒氣客於皮膚搏於血氣腠理閉密氣不宣
泄蘊積生熱故頭痛體疼而壯熱其渴者是熱入臟腑
得熱則津液竭燥故令渴也

傷寒口内生瘡候

傷寒是寒氣客於皮膚搏於血氣腠理閉密氣不得
宣泄蘊積生熱故頭痛體疼而壯熱其口生瘡熱毒氣

在臟上衝胃膈氣發於口故生瘡也

傷寒鼻衄候

傷寒是寒氣客於皮膚搏於血氣腠理閉密氣不得
宣泄蘊積毒氣故頭痛體疼而壯熱其鼻衄是熱搏於
氣而乘於血也肺候身之皮毛開竅於鼻蘊寒先客
皮膚搏於氣而成熱熱乘於血血得熱而妄行發從鼻
出者名鼻衄也凡候熱病而應衄者其人壯熱頻發汗
不止或未及發汗而鼻燥喘息鼻氣鳴即衄凡衄小兒

止一升數合則熱因之為然若一升二升者死

傷寒後下利候

傷寒是寒氣客於皮膚搏於血氣使腠理閉密氣不宣
泄蘊積毒氣頭痛體疼而壯熱也其熱歇後而利者是
熱從表入裏故也表熱雖得解而裏熱猶停腸胃與
水穀相并腸胃虛則泄利其狀利色黃若壯熱不止則
變為血利若重遇冷則冷熱相加則變赤白瀉利也

巢氏諸病源候總論卷四十五

欽定四庫全書

巢氏諸病源候總論卷四十六

隋 巢元方 撰

小兒雜病諸候 凡三十四論

時氣病候

時氣病者是四時之間忽有非節之氣如春時應暖而寒夏時應熱而冷秋時應涼而熱冬時應寒而溫其氣傷人為病亦頭痛壯熱大體與傷寒相似無問長幼其

病形證畧同言此時通行此氣故名時氣世亦呼為天行

天行病發黃候

四時之間忽有非節之氣傷人謂之天行大體似傷寒亦頭痛壯熱其熱入於脾胃停滯則發黃也脾與胃合俱象土其色黃而候於肌肉熱氣蘊積其色蒸發於外故發黃也

時氣腹滿候

時氣之病是四時之間忽有非節之氣傷人其病狀似傷寒亦頭痛壯熱也而腹滿者是熱入腹與臟氣相搏氣否澀在內故令腹滿若毒而滿者毒氣乘心煩懊者死

時氣結熱候

時氣之病是四時之間忽有非節之氣傷人其病狀似傷寒亦頭痛壯熱熱入腹內與腑臟之氣相結謂之結熱熱則大小腸否澀大小便難而苦煩熱是也

敗時氣病候

時氣之病是四時之間忽有非節之氣傷人其病狀似傷寒亦頭痛壯熱若施治早晚失時投藥不與病相會致令病連滯不已乍瘥乍劇或寒或熱敗壞之證無常是也

時氣病兼瘧候

時氣之病是四時之間忽有非節之氣傷人其病狀似傷寒亦頭痛壯熱而又兼瘧者是日數未滿本常

壯熱而邪不退或乘於陰或乘於陽其乘於陽陽爭則熱其乘於陰陰爭則寒陰陽之氣為邪所并互相相加故發寒熱成瘧也

時氣病得吐下後猶熱候

時氣之病是四時之間忽有非節之氣傷人其病似傷寒亦頭痛壯熱而得吐下之後壯熱猶不歇者是腸胃宿虛而又吐利則為重虛其熱乘虛而入裏則表裏俱熱停滯不歇故雖吐下而猶熱也

時氣病後不嗜食面青候

時氣之病是四時之間忽有非節之氣傷人客於肌膚與血氣相搏故頭痛壯熱熱歇之後不嗜食而面青者是胃內餘熱未盡氣滿故不嗜食也諸陽之氣俱上榮於面陽虛未復本帶風邪風邪挾冷冷搏於血氣故令面青也

時氣病發復候

時氣之病發復者是四時之間忽有非節之氣傷人客

於肌膚搏於血氣蘊積則變壯熱頭痛熱退之後氣血未和腑臟熱勢未盡或起早勞動或飲食不節故其病重發謂之復也然發復多重於初病者血氣已虛重傷故也

溫病候

溫病者是冬時嚴寒人有觸冒之寒氣入肌肉當時不即發至春得暖氣而發則頭痛壯熱謂之溫病又冬時應寒而反暖其氣傷人即發亦使人頭痛壯熱謂之冬

溫病凡邪之傷人皆由觸冒所以感之小兒雖不能觸冒其乳母抱持解脫不避風邪冷熱之氣所以感病也

溫病下利候

溫病是冬時嚴寒人有觸冒之寒氣入肌肉當時不即發至春成病得暖氣而發則頭痛壯熱謂之溫病又冬時應寒而反溫其氣傷人即發成病使人頭痛壯熱謂之冬溫病也其下利者是腸胃宿虛而感於溫熱之病熱氣入於腸胃與水穀相搏腸虛則泄故下利也

溫病鼻衄候

溫病者是冬時嚴寒人有觸冒之寒氣入肌肉當時不
即發至春得暖氣而發則頭痛壯熱謂之溫病又冬時
應寒而反溫其氣傷人即發成病謂之冬溫病並皆頭
痛壯熱其鼻衄者熱乘於氣而入血也肺候身之皮毛
主於氣開竅於鼻溫病則邪先客皮膚而搏於氣結聚
成熱熱乘於血血得熱則流散發從鼻出者為衄也凡
候熱病鼻欲衄其數發汗汗不出或初染病已來都不

汗而鼻燥喘息鼻氣有聲如此者必衄也小兒衄止至一升數合熱因得歇若至一斗數升則死矣

溫病胃結候

溫病是冬時嚴寒人有觸冒之寒氣入肌肉當時不即發至春得暖氣而發則頭痛壯熱謂之溫病又冬時應寒而反溫其氣傷人即發成病謂之冬溫病並皆頭痛壯熱凡溫熱之病四五日之後熱入裏內熱腹滿者宜下之若熱未入裏而下之早者裏虛氣逆熱結胃上則胃

否滿短氣謂之胃結也

患斑毒病候

斑毒之病是熱氣入胃而胃主肌肉其熱挾毒蘊積於胃毒氣熏發於肌肉狀如蚊蚤所嚙赤斑起周匝徧體此病或是傷寒或時氣或溫病皆由熱不時歇故熱入胃變成毒乃發斑也凡發赤斑者十生一死黑者十死一生

黃病候

黃病者是熱入脾胃熱氣蘊積與穀氣相搏蒸發於外
故皮膚悉黃眼亦黃脾與胃合俱象土候肌肉其色黃
故脾胃內熱積蒸發令肌膚黃此或是傷寒或時行或
溫病皆由熱不時解所以入胃也凡發黃而下利心腹
滿者死診其脈沈細者死又有百日半歲小兒非關傷
寒溫病而身微黃者亦是胃熱慎不可灸也灸之則熱
甚此是將息過度所為微薄其衣數與除熱粉散散
之自歇不得妄與湯藥及灸也

黃疸病候

黃疸之病由脾胃氣實而外有溫氣乘之變生熱脾與胃合候肌肉俱象土其色黃胃為水穀之海熱搏水穀氣蘊積成黃蒸發於外身疼髀背強大小便澁皮膚面目齒爪皆黃小便如屋塵色著物皆黃是也小便宣利者易治若心腹滿小便澁者多難治也不渴者易治渴者難治脈沈細而腹滿者死也

胎疸候

小兒在胎其母臟氣有熱熏蒸於胎至生下小兒體皆黃謂之胎疸也

瘧病候

瘧病者由夏傷於暑客於皮膚至秋因勞動血氣腠理虛而邪乘之動前暑熱正邪相擊陰陽交爭陽盛則熱陰盛則寒陰陽更盛更虛故發寒熱陰陽相離則寒熱俱歇若邪動氣至交爭復發故瘧休作有時其發時節漸晏者此由邪客於風府邪循脊而下衛氣一日一夜

常大會於風府其明日日下一節故其作日晏其發早者衛氣之行風府日下一節二十一日下至尾骶二十二日入脊內上注於伏衝之脈其行九日出於缺盆之內其氣之上故其病發更早其間日發者由邪氣內薄五臟橫連募原其道遠其氣深其行遲不能日作故間日蓄積乃發也小兒未能觸冒於暑而亦病瘧者是乳母抱持解脫不避風者也

瘧後餘熱候

夫風邪所傷是客於皮膚而痰飲漬於臟腑致令血氣不和陰陽交爭若真氣勝則邪氣退邪氣未盡故發瘧也邪氣雖退氣血尚虛邪氣干於真氣臟腑壅否熱氣未散故餘熱往來也

瘧後骨內結硬候

瘧是夏傷於暑熱客於皮膚至秋復為風邪所折陰陽交爭故發寒熱其病正發寒熱交爭之時熱氣乘藏藏則燥而渴渴而引飲飲停成癖結於骨下故瘧後骨內

結硬也

瘧後內熱渴引飲候

瘧病者是夏傷於暑熱客於皮膚至秋復為風邪所折陰陽交爭故發寒熱成瘧凡瘧發欲解則汗汗則津液減耗又熱乘於臟藏虛燥其瘧瘥之後腑臟未和津液未復故內猶熱渴而引飲也若引飲不止小便澀者則變成癖也

寒熱往來候

風邪外客於皮膚內而痰飲漬於腑臟致令血氣不和
陰陽更相乘剋陽勝則熱陰勝則寒陰陽之氣為邪所
乘邪與正相干陰陽交爭時發時止則寒熱往來也

寒熱往來五臟煩滿候

風邪外客於皮膚內而痰飲漬於腑臟致令血氣不和
陰陽交爭故寒熱往來而熱乘五臟氣積不泄故寒熱
往來而五臟煩滿

寒熱往來腹痛候

風邪外客於皮膚內而痰飲漬於腑臟血氣不和則陰陽交爭故寒熱往來而臟虛本挾宿寒邪入於臟與寒相搏而擊於臟氣故寒熱往來而腹痛也

寒熱結實候

外為風邪客於皮膚內而痰飲漬於腑臟使血氣不和陰陽交爭則發寒熱而臟氣本實復為寒熱所乘則積氣在內使人胷脅心腹煩熱而滿大便秘苦難小便亦澀是為寒熱結實

寒熱往來食不消候

風邪外客於皮膚內而痰飲漬於腑臟使血氣不和陰陽交爭則寒熱往來其脾胃之氣宿挾虛冷表雖寒熱而內冷發動故食不消也

寒熱往來能食不生肌肉候

風邪外客於皮膚內而痰飲漬於腑臟使血氣不和陰陽交爭故發寒熱往來胃氣挾熱熱則消穀穀消則引食陰陽交爭為血氣不和血氣不和則不能充養身體

故寒熱往來雖能食而不生肌肉也

胃中有熱候

小兒血氣俱盛者則腑臟皆實故胃中生熱其狀大便則黃四肢溫壯翕然體熱

熱煩候

小兒臟腑實血氣盛者表裏俱熱則苦煩燥不安皮膚壯熱也

熱渴候

小兒血氣盛者則腑臟生熱熱則臟燥故令渴

中客忤候

小兒中客忤者是小兒神氣軟弱忽有非常之物或未
經識見之人觸之與鬼神氣相忤而發病謂之客忤也
亦名中客又名中人其狀吐下青黃白色水穀解離腹
痛反倒夭矯面變易五色其狀似癇但眼不上搖耳其
脈弦急數者是也若失時不治久則難治若乳母飲酒
過度醉及房勞喘後乳者最劇能殺兒也

為鬼所持候

小兒神氣軟弱精爽微羸而神魂被鬼所持錄其狀不覺有餘疾直爾痿黃多大啼喚口氣常臭是也

卒死候


小兒卒死者是三虛而遇賊風故無病倉卒而死也三虛者乘年之衰一也逢月之空二也失時之和三也有
人因此三虛復為賊風所傷使陰氣偏竭於內陽氣阻
隔於外而氣壅閉陰陽不通故暴絕而死也若腑臟未

竭良久乃蘇亦有兼挾鬼神氣者皆有頃邪退乃生也
凡中客忤及中惡卒死而邪氣不盡停滯心腹久乃發
動多變成注也

中惡候

小兒中惡者是鬼邪之氣卒中於人也無問大小若陰
陽順理榮衛平和神守則強邪不干正若精氣衰弱則
鬼毒惡氣中之其狀先無他病卒然心腹刺痛悶亂欲
死是也凡中惡腹大而滿脈緊大而浮者死緊細而微

者生餘勢不盡停滯臟腑之間更發後變為注也



巢氏諸病源候總論卷四十六